

【線上學習】李秉璋原作

神奇、神奇盡神奇，上課毋使趕，交通毋會塞，想愛學麼个斯學麼个。先生任恁擇，時間任恁選，三更半夜乜做得，先生講到生趣又清楚。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使繳學費，你想愛學，佢斯會教。

不管你係巧神¹抑係慧當²，佢全都收。佢無擇學生仔、無擇時間、無擇地方，單單擇你，擇你想愛學个心。這係學習个革命，這係時代个轉變。來著急、來著遽，跔得著大進步，斯像膻身脣有仙人指點，武功大進。

馬桶毋曉修理有人教，鏈鋸毋曉發，一步一步來，秘訣³教你知。網路線个接頭線路毋曉排，有人教你色目愛分明，五彩六色照順序，工具又特別，頭尾一下摺佢夾落去，接頭插好網路就通。

雖然講一隻銀角仔毋會響，毋過先生大部分都係自家在該做

戲，講到口水波潑、精神飽滿、歡頭笑面，斯像毋會恹合有耐心！一遍教毋會，過教一遍，你想愛學幾多回斯學幾多回，學到你自家毋愛學。

千里緣分一線牽，天下全在恁彈指之間。現代生活當舒適，冷氣吹，彈指間，毋使出門、毋使尖車，想愛仰般學斯仰般學。就算係疫情時節，學校个線上教學，有一息無恁自由，毋過乜有人非常認真，一片聽課，一片查資料，正經係講一知三，師傅渡入門，修行在個人。上課講義自家留，毋使抄，三隻快速鍵一撇，滑鼠一拖，講義黏時留下來。

當日上課紀錄先生有錄製，驚你單單係「用手機上課定」，人毋知走哪位去。所以先生上課會問問題，一半問，一半係在該點名，看你心思有在這無？認真上課个，回答無問題，又講頭斯知尾，無用心个乜無問題，平平無問題，這個係毋知半項，所以無問題。連先生喊佢回答，佢也像在人間消失，無鏡頭、乜無回答聲，訊息欄裡肚乜無留字，所以佢正經係「用手機上課定」。

線上學習，成就隨在人，逐儕有選擇个自由，斯愛對自家个人生負責定。對自家未來正經个慷慨，就係摺一切都貢獻分現時。今日个恁，成就韶早个恁。

¹ 巧神：音 kiau' shin；聰慧，屬具特殊能力的聰明。

² 慧當：音 ngong' dong'；呆愚、傻呼呼。

³ 秘訣：音 bi' gied；訣竅，指事物的要領、竅門。

編號 3 號

【鷓鴣飛啊飛】張瑞玲原作

打早，日頭正對東片鷓鴣嘴¹個後背爬起來，輝煌又晟眼个金線射落天頂。佢踩等該臺一騎斯歸路響个老自行車，來到佢个百果園，還話著講今晡日日頭一出斯來到這位，算當早咧！無想著，正踏落園肚，隔壁種大梨个阿權哥斯在該大聲喊咧！「喂！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？做麼个做得七早八早斯來到這位？心肝肚還想等，嘴叮又毋肯認輸，對嘴斯應佢：「無啦！毋係來做事，係來看鷓鴣得似²啦！」

佢个園在龍崗園等个窩肚，若係堵著像今晡日恁樣个好天時，打早斯會有三、四隻大鷓鴣，在四圍个山嶺頂飛啊飛仔。

摺阿權哥个嘴鼓都還宕打煞，聽著遠遠个位所傳來「咻！咻！」个聲，鷓鴣出來咧！阿權哥看著鷓鴣出來，做等个山園事頭也無掛做咧，跔等一陣來搯接梨仔个工人，坐在佢該工寮个蔭影³下欣賞這齣大自然个表演。

¹ 鷓鴣嘴：音 rhau⁺ po zui⁺；東勢東方山峰名，華語稱鷓鴣山。

² 得似：音 ded sii⁺；語助詞，表確定。

³ 蔭影：音 lim⁺ rhang⁺；樹下照不到太陽的地方。

看佢兜閉閉長長个翼胛、跔等燒氣，慢慢迂、定定仔盤，越迂越高、緊盤緊遠，背尾變成天邊个一隻烏點，當像優雅个天頂王者，對天頂看等佢兜守護个土地。

成下仔，會看著佢兜胸挺挺、目叮叮停在脣頭个樹樑頂高，好恬恬無聲無哨斯春往下，一瞞目轉身又飛往上，尖尖利利个爪叮，拖等一尾挨著神頭个蛇哥，斯一路「咻！咻！咻！」風神哎哎⁴飛落密密个樹林裡肚。

又成下，看佢兜在高高个天頂盤來飛去，忽然間，兩片翼胛一收，對天頂直直梓往下，佢个心肝肚還想等：「這隻鷓鴣這下穩死無命咧！」毋過，看佢強強都會撞著地泥咧，翼胛一閉、利爪一伸，在頓恬个一瞞目時間，佢該雙利爪叮，毋知哪時抓著一隻臘身還在該扭啊扭个大老鼠，一轉身又飛到半天高咧！

歸陣人看鷓鴣表演看到嘴擘擘仔，有人講：「難怪，在這埕山園做恁久个事，難得看著蛇哥，斯係有這兜鷓鴣守顧這搭土地，戴在這四圍个老嫩大細正有好平安生活啊！」

⁴ 風神哎哎：音 fung⁺ shin ngai⁺ ngai⁺；洋洋得意。

【螫蜂叮著記】李政璫原作

分螫蜂仔¹叮著咧！

該日朝晨去山肚巡水做事，無看著路脣个竹林頂高有大蜂窩，乜無細義撞著該支竹仔，佢兜就尋著佢。惡豺豺个蜂仔黏時斯飛在佢脣頭迂迂轉，向等佢个臉身黏過來。佢搥開一隻看起來係螫蜂仔，驚到煞煞走，一頭退、一頭搥臉身搥頭那毛頂高个蜂仔。退到無蜂仔个位所，正感覺頭那暈暈人怪怪，遽遽行轉屋歇睏一下。

無幾久，佢个頭那、臉身、手髀搥腋下開始做下會痛，頭那感覺像雲浮在天頂，又分人繃等樣，浮浮、腫腫又合纏纏，歸隻頭那昂昂²無法度思考。左手个手巴掌腫到像紅板，手痺痺、手指尾會伸毋會勾；坐毋核、睡毋得，唉唉唧唧實在艱苦，係做得，斯想困到泥窩肚去。

最尾分人送去醫院掛急診，講著有十過隻蜂仔叮著佢了後，醫生當認真搥佢講：「一般來講，分螫蜂仔叮著二十針以上，斯可能有生命危險，這種个蜂仔無解毒个血清、較傷重个成時會引

起過敏性个失氣無斯溶血个症頭，最好愛先通知你屋下人。」醫生安排吊大筴射³、注射搥抽血，交代佢先歇睏一下，係有麼个所爭愛黏時講。

等佢略略仔睡一下過後，感覺好盡多斯想愛轉去。毋過醫生愛佢過歇睏一下觀察看啊，最好等屙尿个尿水色正常正好轉，若係變烏暗个泥色，斯較麻煩愛送大醫院，愛一直等到無麼个问题正做得出院。最尾都無問題咧，醫生還係掛心講：「開个藥仔愛照三餐食，有哪位無鬆爽就愛煞煞過來哦。」

轉屋下換衫褲正知總共叮著十六針，兩支手髀發炎紅腫，非常癢⁴。左手个手巴掌還係紅腫無感覺、頭那暈暈想愛睡。睡到半夜緊爪，癢到硬硬愛搥皮掀開、爪到骨髓去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效，當神奇，食了該暗晡斯盡好睡毋會癢咧。

這下蜂仔叮个位所已經結疤咧，看著這兜堅疤又過一擺分佢想著：該時節、該兜蜂仔，佢一個人在山肚有幾危險！

¹ 螫蜂仔：音 ang` pung` er；虎頭蜂。

² 昂昂：音 ngong ngong；頭昏神智不清。

³ 吊大筴射：音 diau` tai` gong sha`；吊點滴。

⁴ 癢：音 hoi；癢。